

卷之五

前調 偶憶

疎烟暮靄人在斜陽秋草外夢遶天涯知是當壚
第幾家舞裙歌扇猶憶邊雲花底讌楚客愁多
欲採芙蓉奈遠何

前調 雨後

秋葵帶露紅滿窗紗蟬滿樹不管閒愁倚杖浮雲
度畫樓雨絲風片消受新涼深小院蝶過誰家
閒煞牆頭夜合花

前調 又

風吹禾黍幾陣蕭蕭山市雨秋色三分讓與漁家

水竹村。蘚階獨立萬戶聲。催雙杵急柳外寒塘。
牛背歸來正夕陽。

鳳凰臺上憶吹簫

悼亾

用李清照韵

衣冷筠籠塵封瑤瑟頓教白了人頭嘆鏡奩虛掩
風動簾鈎比翼生生世世燈背處私語都休燕臺
月新添憔悴恰是中秋 休休同林宿鳥緣底事
分飛一霎難留剩寒燠獨照露下粧樓想像珊珊
環珮頻悵望幾斷雙眸空消受江淹有恨宋玉多
愁

蝶戀花

又

衣桁闌珊菱鏡悄風雨摧花不許朱顏老淺笑微
颯風態杳瑣窗猶自啼籠鳥 隻影羞人燈暗了
長記鷓鴣錦幄薰龍腦兩點遠山誰更掃沈郎一
夕腰圍小

點絳脣

又

玉冷秦臺鳳簫響絕閒蕭史芙蓉落矣璧月憐秋
水 誰與溫存小閣香肩倚孤眠裏畫笳聲起偏
到愁人耳

燭影搖紅

又

舉案清娛流蘇宛轉低屏箔薰香傳粉絕纖塵窗

几渾如昨寂莫梧桐夜雨何從覓金釵鈿合記來
朝罷小立妝臺看他梳掠 愁髻安仁絲絲總爲
情擔閣竝頭菡萏紅香一霎西風惡自古聰明
薄命男兒淚英雄氣索遣哀無計此恨綿綿地長
天濶

念奴嬌 又

啼猿聲裏正蕭疎一片霜天秋色絃續鸞膠看兩
兩比翼連枝無別洛浦珠沉湘靈瑟冷剩有寒螿
咽鍾情我輩那堪蘭蕙重折 回首燈火春宵茗
爐佳夕鴛枕偎猶熱畱得零香餘粉在種就柔腸

千結爲問飛瓊還歸天上可憶來時節蠶絲難盡
夢回簾外殘月

滿江紅 又

造物如何遽收拾鴛鴦牒早把香天粉并刮塵埋
了初擬鹿門同載去那知更踏長安道到如今白
首送青春真顛倒 蜃市結風鬟曩午夢醒槐宮
杳想定情良夜倚燈人小紫蟹黃英難共醉都堪
摹作淒涼稿對西風獨立哭斜陽閒花草

菩薩蠻 又

玳梁當日棲雙燕碧桃花下看人面往事耐思量

銀鏡照晚妝 寶鈿空瑟瑟愁煞西堂客腸斷只
三聲長更與短更

陽臺夢 又

深秋院落房櫳暮倚闌細數經行處濃香畫幔掛
珊瑚鎖疎烟薄霧 空階風颭颭吹散芳魂幾縷
一簾燈火又昏鐘疼煞黃花雨

晝錦堂

送二兄

予告歸里

鴉亂斜陽林吹寒籟極目秋滿燕關惆悵無端別
緒又送兄還去逐平沙孤雁影何堪城闕菊花天
君恩重賜沐清時風携兩袖歸田 離筵樽酒

外驪唱裏白雲遮斷家山憶昔驚濤駭浪共與回
旋喜看新結漁樵侶愧余猶滯鷺鷁班頻回首開
盡故園叢桂並隱何年

孤鸞

壬子除夕

禁城喧熱正爆竹聲催漏銅風咽小閣孤燈往事
向誰重說春到何家庭院助新愁滿門冰雪枉有
屠蘇歲酒恨椒花頌絕 想五侯甲第歡無歇把
龍笛鶯笙檀口吹徹那管寒衾薄有人兒淒切珊
珊玉珂初動又趨朝曉雞時節試問來朝鏡裏添
幾莖華髮

洞庭春色

次韵酬吳江徐電發

獨步江東羣推孝穆志在千秋儘詞華潘陸恣情
採擷新聲秦柳匹意研求入洛才人追二俊遇傾
蓋公卿便駐騶吾衰矣看中原鞭弭輸與林丘
當年陳琳阮瑀草檄處名滿諸侯羨扁舟書劍五
湖烟月春城絲管六代歌樓樽酒旗亭風雅會料
此際歐陽放出頭西陵畔聽江潮怒發笑引吳鈞

玉樓春

送春

花飛南陌東風暮腸斷王孫芳草路綠槐影裏雨
初晴黃鳥聲中春暗去亂山疊疊看無數故國

遙遮雲外樹一年佳景等閒拋好夢欲尋無覓處

卜算子

喜雨

晨起火雲生棋罷珠簾午暗送牆頭夜合香粉蝶
雙飛去汗滴透羅衣手倦揮紈素乍喜風來似
故人幾點榴花雨

一剪梅

題畫扇

翠巘遙連起白雲嵐色當門樹影當門平坡如掌
靜無塵何處閒人來訪閒人茆屋匡牀幾度春
花鳥相親風雨相親寒香一抹暗消魂雪意三分
梅信三分

永遇樂

七夕觀項王諸劇同汪蛟門舍人陸恂若茂才王子諒內弟王奕臣內姪吳介侯甥長源弟

大火西流雙星初會填河佳節絳燭高燒湘簾暮
捲歌舞當筵設賓朋膠漆披襟引滿領取澹雲新
月暑將殘秋光一片先到鳳城雙闕 鍼樓兒女
競陳瓜果自笑吾生全拙急管繁絲好天良夜莫
問蕭蕭髮周郎在座伊涼悲壯千古風流堪接嘆
劉項紛紛蟻戰英雄銷歇

前調

寄田髯淵孝廉

大雅猶存雲間馳譽君才無匹屈宋衙官凌顏轢

謝早擅生花筆何緣高臥荒江寂寞歲月閒中拋
擲憶當年論文把臂雲樹頓分南北 茂陵病免
襄陽坐廢萬事總堪浮白鞭弭中原卿當獨秀領
袖詞場客旗亭貰酒梨園潦倒佳句雙鬢偏識秋
風裏萼鱸三泖有人抱膝

滿庭芳

寄懷雲間王伊人侍御

執斧中朝掛冠神武十年穩臥林臯春申浦畔烟
水命輕舸坐看九峯雲氣伏枕處海鶴凌霄琴尊
外左圖右史世路任風濤 兒曹伯仲是當年二
陸壓倒時髦更臚傳高第郢曲彌高江左衣冠領

袖趨庭夜笑引醇醪倘存記故人消息白髮漸飄
蕭

蝶戀花 人日

紅日窺窗春意逗剪綵爲人戴勝今朝又睡起尚
嗔人語驟曉粧無力東風透 輕暖輕寒渾似舊
笑問檀郎驗取腰肥瘦六博閨中誇勝手鬢邊不
覺金釵溜

眉峯碧 春暮

深院鞦韆罷細雨梨花夜曉起閒庭一片飛忍又
見山桃謝 蛺蝶枝頭掛苦憶前春話門外東風

鏡裏顏背人無語斜陽下

驀山溪 題子培姪楫石齋圖

山房小構玩世名心懶愛片石峻嶒伴藜榻香爐
茶椀正襟抗手慕海岳風流左圖畫右琴書牖上
樽嘗滿 妻孥爲黍粗糲儒家飯二仲偶招尋共
斟酌瓦盆羹瓊南窗寄傲白眼向時人貧自樂夢
無驚世事憑誰管

望湘人 旅中九日

看門前寶馬柳外紅亭匆匆心事難說袖染餘香
巾藏暗淚愁聽一聲離別萬里羊城五湖鯨浪夢

冤飛越憶昨宵絮語丁寧曾約歸期春月惆悵
山長水疊捧鸞書一紙早辭雙闕正露冷蒹葭依
舊河流淒咽孤影裏對驛燈明滅夜角麗譙吹徹
一般樣綠階黃花辜負重陽時節

訴衷情

旅懷

夕陽古道斂殘霞南雁數行斜何緣人却如雁迢
遞驛程賒回首處鳳城遐亂雲遮燈寒香閣風
起郵亭人去天涯

菩薩蠻

宿伏城驛

伏城明月渾如昔往來照盡長征客今日我重過

其如孤影何遙看雲外樹總是來時路莫喜到
家鄉鄉愁到更長

滿江紅

過黃梁夢

官柳參差消磨盡英雄多少問華胥遠近黃梁遲
早仙侶已隨雲影去行人又上邯鄲道怪枕中日
月一何長河山小村市畔墟烟裊亭榭外殘荷
老任開山汗馬閒花野草壁上痴人爭說夢那知
醒裏多顛倒倩西風一夜捲空花都堪掃

念奴嬌

過紆柳長廊有感

滹沱南陌憶當年綠柳依依堪折夾道長條張翠

幄清影寒生六月汗滴征衫塵飛驛路到此清涼
別今來駐馬濃陰一旦殘缺聞道舊日隋堤春
來渭樹空有蟬聲咽可惜長廊烟霧冷轉眼繁華
銷歇莫問秋風樹猶如此何況三千髮長途搔首
愁聽枝上啼鳩

減字木蘭花

邯鄲遺典

短檠孤館錦幄溫存天際遠澹掃鉛華半在邯鄲
俠少家多情耽悞一笑因緣艱陌路馬上牆頭
不見當時舊畫樓

菩薩蠻

旅懷

驛亭秋盡寒風起離人今夜思千里刻燭幾踟躕
南來少雁書酒樽聊獨對半是閨中淚且莫盼
書來音書亂客懷

減字木蘭花

題畫扇

遙汀疎柳畫舫蘭橈沙岸口小坐篝燈堤外青驄
嘶未曾黃昏有約明月蘆花無定著茗椀香爐
十樣蠻箋薛校書

子夜歌

大店驛

泥牆草屋雞聲咽二千里外看明月地已入江淮
風沙何倍來鄉愁人似醉強伴昏燈睡雁到怪

無書連朝并雁無

念奴嬌

江行

用東坡韵

吳頭楚尾掛長帆別是一般風物白浪排空天作
塹界破東南半壁遠樹微茫遙峯斷續夾岸霜如
雪烟波無恙消磨幾許人傑坐聽鼓吹中流候
風回五兩棹歌齊發向晚推窗指顧中數點漁燈
明滅牛斗浮槎鄉關回首處頓更毛髮空江渺渺
憑闌涼轉新月

千秋歲

長至泊廬山下

遙青縹緲彭蠡湖天曉葭管動陽回早香閨添綵
線畫閣薰龍腦人何處樓船官燭寒相照星渚
環山堞戰壘埋荒草傷往蹟渾如掃爐峰烟未收
鹿洞雲還繞濤萬疊月明一點匡廬小

水龍吟

贈羅弘載

榻來髯客江東樓船把袂波如練長篇短咏抽毫
伸紙烏絲蠶繭七子菁英六朝金粉風流非遠任
青鞋布襪窮關塞名山喬嶽遊踪徧行笈圖書
數卷幾悲歌黃金臺畔探奇禹穴臨池蘭渚聲華
早擅雪苑開樽旗亭觀伎詞場消遣問相如可有
臨邛重客子虛誰薦

蘇煥遮

彭湖舟中題弘載所藏呂半隱畫

石林幽茆屋小今古丹青舉似吳興少蜀客移家
浮玉峭供養烟雲揮手紅塵早 片帆輕嵐翠裊
宛委詞人携得江山到懶瓚風流渾未杳幾幅溟
濛過眼匡廬曉

沁園春

登令公祠畔望湖亭

潑灩湖光黛染遙山送目方賒喜紅亭俯立一天
帆影白波東去幾縷殘霞方寸鄉心迢迢水驛愁
絕風濤博望槎徘徊處有喧闐列肆烟火千家
神祠擊鼓鳴笳想吳楚當年鬪麗華任青帘貫酒

蝦
醉眠賈舶牙檣吹角驚起棲鴉橫梁雉才登樓客
况消盡江頭野草花雲烟閣正臺連蛟蜃人侶魚

過秦樓

吳城雨中

樹隱千章風輕五兩堤畔人家容與柴門照水沙
岸連檣一片吳城烟雨遙望曉捲疎簾小婦凝粧
映窗眉嫵嘆天涯客子三千餘里雁沉汀浦 空
聞說白苧江東錦帆南國顛倒醉鄉歌舞寒林半
落霜葉猶紅愁見鳧鷖孤嶼更羨高風此邦孺子
荒亭雲卿黃土問江山萬古茫茫今夜夢回何處

戀繡衾 舟過樵舍

樹色參差青未謝，斷嶺重崗一抹烟如畫。漠漠江村寒雨乍，人家晒網疎籬掛。門外平橋臨水榭，柔櫓輕帆清嘯。船窗下遠浦歸舟，垂釣罷乘風欲問漁樵話。

釵頭鳳 閨情

簾櫳悄流蘇，小薰籠斜倚香還裊。歡方嫩，愁來頓織腰非舊。湘裙爭寸褪，褪。釵斜掉，梅如笑。銀缸生暈，燈花爆。春將近，鴻無信。天涯人遠，金錢難問恨恨恨。

滿江紅 泊滕王閣下

森森寒濤看百尺，蜃樓高結。問此地何年畫棟幾時明月。帝子閣空雲已散，詞人賦就名還揭。下長帆對酒數憑闌。江天雪。簾捲處嵐光疊，霞影外沙沉鐵。嘆樓船組甲當年烟滅。鷓首淒清，鳧雁度波心。澆潯魚龍咽，攬笙歌客醉舊江山。鄉心切。

念奴嬌 舟發章門楊陶雲載梨園置酒敘別

江城如畫，雪初晴，渺渺長天空碧。好友輕帆携酒到，載得滿船春色。吳下秦青，新翻樂府，橫吹寧王笛。旅懷無奈，茫茫對此交集。憐我海角浮踪，逢

君遷客相對頭堪白舞罷柘枝歌子夜攪起魚龍窟宅杜牧情多司空見慣懊惱紅燈夕地隣湓浦青衫今日重濕

連理枝

閨情

暮靄生虛幌雪片飄如掌蟬髮微鬆水沉香冷簾旌休敞望遠遊孤客蠟煤消盡金釵墜響

江南春

同前

風撼撼漏沉沉眉橫螺子綠髮壓辟寒金梅英一瓣飛香雪引起春愁到翠衾

宮中調笑

同前

簷鵲簷鵲朝來竝飛粧閣鏡臺螺黛生塵夢裏相逢遠人人遠人遠試報歸期早晚

又

銀箭銀箭暗牽春愁如線倦來繡幄寒輕雙下金鈎響聲響聲響背褪鞋兒一綉

醉花陰

瓶梅

疎影一枝風裊裊暗送寒香小淺水照橫斜高士山中春色生多少黃昏孤枕江聲悄新月窺人好遙憶綺窗前晴雪霏霏銀蒜垂簾早

宮中調笑

曉粧

朝起朝起侍兒催人梳洗夢回臉暈紅潮對鏡雙
眉嬾描描嬾描嬾留待檀郎湘管

前調 晚浴

紗幔紗幔輕綃半沾香汗下簾豆蔻湯溫拭粉紅
消舊痕痕舊痕舊驗取腰肢肥瘦

前調 午睡

春困春困鷓鴣香班燒燼一團花倦窗西好夢閒
階影移移影移影惱被鸚哥喚醒

前調 夜坐

新月新月漏深畫簾輕揭鴛鴦繡罷釵偏伴冷蘭

缸碧烟烟碧烟碧樓上誰家玉笛

明月斜 閨情

漏三更香一縷妾夢長隨嶺上雲郎停錦纜何州
雨

又

燈半昏寒猶峭繡被濃薰百和勻春纖冷撥么絃
小

鳳棲梧 初度

往日懸弧簾捲處花滿蘭房絲竹風前度綠酒紅
燈雲影駐斑衣兒女歡聲絮今夜孤衾庾嶺暮

海角笙歌無奈思千緒料得香閨人澹佇好教歸
夢隨潮去

百字令 次韵酬羅弘載

天涯初度雨新晴過嶺寒消花放孤客牙門聞曉
角欲說離愁誰向海嶠樽罍蠻兒歌舞良夜同人
餉多情子野百端齊到心上獨幸峴首碑存樓
船戰罷依舊繁華相共道先人今有後父老車前
相望好友鴻篇詞塲綵筆競奏陽春唱深慙衰髮
斗筲每自知量 先人舊守雒州

瑤臺第一層 三水泊舟開府諸君召飲江亭

萬里羊城今咫尺飛帆幕府畱艤舟三水簾開珠
箔幢擁青油海天烟煖瘴嶺客來一洗羈愁喜春
早正紅生亭榭綠滿汀洲朋儔主人情重鳳笙
龍笛夜啁啾尉佗臺畔田橫島外半醉江樓對蠻
方節鉞把手處頭髮霜稠嘽歌喉問誰占星使到
自神州

雙頭蓮 嶺南元夕

海外繁華看絳燭圍紅星毬初放蠻鞞錦障月影
裏忘却鄉愁孤况暗想京國燈宵阻雲山千嶂春
一樣紫陌香塵有無鈿車來往憑仗午夜笙簫

把軍烽靜偃消除兵象江湖晚漲燒火樹粧點羊
城尤壯聽罷白苧吳歛有周郎座上天萬里對酒
當歌相看愴慷

兩同心

嶺南歸興

粧閣燈紅王孫草碧驚烽火羅袖啼痕憶遠棹粉
奩寒夕對東風兩地牽愁韶光拋擲 今日江帆
回北滿船春色雕籠鎖鸚鵡音圓名香選鷓鴣斑
擘報深閨不爽刀環海南歸客

洞庭春色

歸舟

萬里河梁五羊歸櫂夾路春風看荔枝洲畔沉香

浦外簾開樓閣帆動艤艫載得珠江花鳥去更千
步香薰兩袖濃斜陽岸正袍侵草綠衣染鶉紅
麝藏羅浮舊繭早辦取舞蝶紗籠問踏歌蠻樂穿
花遊女尋芳何地拾翠誰從拋却南天烟月暖喜
北望長安紫氣重驪歌裏聽蘭橈笳鼓驚起鼉宮

嶺南有千步香草
又羅浮繭中出蝶

鷓鴣天

春雨

滿載離愁聽曉雞一天風雨晝淒淒潮來畫艇春
波滑雲暗遙峯黛色低 竟欲斷路還迷山深惱
煞鷓鴣啼鏡中珍重朱顏好指日帆懸楚水西

瀟湘神 春日

春水流春水流嶺南雨氣似深秋苦憶故園花事
好寒雲片片夜猿愁

又

春草肥春草肥越王臺畔布帆歸何處酒旗堪醉
客曉鶯聲裏一花飛

又

春日晴春日晴海天回首綠烟平簫鼓千船牽錦
纜幾番花醉五羊城

又

春岫齊春岫齊素馨叢裏鷓鴣迷遊女踏歌花外
去雙雙羅襪蹴香泥

滿江紅 雄州感舊

澗水漸漸幾番歷興亾今古伴戈船羽檄珠簾歌
舞總角曾看庾嶺月白頭更聽凌江雨問當年城
郭舊衣冠皆黃土 翻翡翠銀塘去迴紫燕雕梁
語嘆春風一樣朝朝暮暮天許遠來星漢客不堪
往事傷心數怪海南風世有何緣遊重補

青玉案 題扇面蜂蝶

落花飛絮遊絲冒傷若箇秋千院鳳子蜻蛉雙翅

顫尋香沾粉綴紅成片莫使愁人見
綠烟如織
銀塘慢性癖長耽花鳥伴苦被黃塵催髮短謝池
春咏勝王蜨戀寫入輕羅扇

庭院深深

閨情

人遠雕櫳閒屈戌芙蓉影瘦三秋春來懶整玉搔
頭山桃開盡何處滯蘭舟
紫燕不知儂落膽飛
飛觸響簾鈎棟花風起入粧樓
嗔郎薄倖珠串濕
香篝

玉樓春

春閨

燒殘魚片凝粧坐懶把蠻牋催曉課
研羅裙子蝶

鬚牽玉燕釵梁花刺墮
香泥小步苔痕破
報道
春歸眉暗鎖繡牕兒女太愁生
手弄櫻桃紅數顆

踏莎行

暮春

鶯轉林梢蝶沾粉絮押簾銀蒜牽蛛縷
鴛鴦幔揭
鬱金寒秋千索挂東風暮
綠暗西園雁沉南浦
檀郎驕馬知何處
章臺街裏
片花飛紅粉樓中
三月雨

東風第一枝

途中送春

柳絮鋪勻梨花落盡客愁踏遍階
屐輪軒尚滯歸
途畫闌共誰同倚江南春色都分付
野田流水問

幾家爍炙笙簧何處競薰羅綺 門悄悄戍樓晚
吹風閃閃驛燈落翠枝頭嬾聽鶯奴簾間怕飛燕
子流蘇宛轉想小閣短檠鍼指盼此宵有夢先回
可到鴛鴦幃裏

菩薩蠻

贈伎

斜風細雨清宵永徘徊忽見燈前影命薄每傷神
偏憐薄命人 輕羅迴小扇省識如花面百媚坐
來生無情若有情

前調

立秋

高城月上陰雲斂芙蓉遠送清香滿一葉井梧秋

西風吹鬢愁 笙簫華館沸攪得蟬聲碎乍覺晚
涼多聞歌喚奈何

前調

贈女伶

樽前若個歌金縷盈盈十五芳如許笑靨半含羞
驕愁不解愁 眉痕青尚淺秋水雙眸剪何處耐
人思歌停掩袖時

醉桃源

季夏雨後飲舅氏園中

古槐疎柳度輕颺荷香隔院飄柳陰清露綴葡桃
開樽興倍豪 金跳脫紫檀槽有人態色饒解襟
滅燭影蕭蕭巖更促醜蕉

如夢令 夜雨

清簾琅玕初展殘角數聲風斷不寐檢新詩雨打
芭蕉零亂人倦人倦一夕荷花缸滿

阮郎歸 登樓酌月

碧天無際近中秋臺高樹影稠雪見一曲韻悠悠
簫聲出畫樓 銀箭促暮雲流娟娟月似鈎寒消
酒力與偏幽佳人翠袖愁

賀新涼 夢寤

雙鬟和愁織嘆幾年颶風駭浪飄搖京國百尺元
龍樓上臥靜看榮枯得失正滿目疎烟澹日搔首

青天頻借問奈浮雲漠漠無消息俯仰事皆陳迹
一當時浪作金閨客到此際壯懷消盡禪心頓寂
旅雁數聲沙畔冷別浦芙蓉蕭瑟但此意誰人識
得一枕夢回殘月曉儘談空說有何從覓暮鼓罷
晨鐘急

十六字令 閨雪

花六出凝粧繡幙前春纖冷懶整玉釵偏

漢宮春 除夕時予年四十九

殘雪初融聽千門爆竹此宵何夕梅橫小閣春透
一分消息匆匆歲月漸知非驚心明日未曉鐘風

光猶是今年莫教輕擲 處處辛盤如昔正春衫
試著鵝笙暖炙屠蘇到手偏怪新來遲得閨中少
婦頌椒花酒清燈碧看見女彩衣成列休問漏聲
頻滴

倦尋芳

人日雪

曉窺牕色寒透香衾雪壓鴛鴦七日爲人剪綵鏤
金清晝灑銀屏飄繡幌韶光點綴梅花瘦對芳辰
忍教辜負了綠尊紅袖 壽陽粧落英不去佳話
流傳閨閣知否勝賞無多須放眉峯微皺瞬息樓
臺歌吹冷東風小院聽殘漏值千金好憐惜早春

時候

過秦樓

燕九憶長安舊遊用周美成韻

燈夕纔過芳原九日仙闕白雲遮斷帘青酤客草
綠王孫迤邐暖風輕扇馳驟俠少青驄玉勒金羈
雕弧長箭走珠軒隱隱水邊紅袖笑聲來遠 猶
記憶朋輩開樽橋西清眺沾醉春衣痕染習池倒
載蘭若停驂人事倏然多變懸想旗亭舊遊一樣
韶光柳嬌鶯倩悵離羣數載極目蒼山幾點

一叢花

東村觀海棠

垂楊東去徑逶迤村口綠烟迷高樓書閉春風暖

海棠映麗日遲遲枝弄鶯簧香翻蝶粉妃子睡醒
時艷陽天是看花期誰解惜芳菲東君付與閒
人管歡場裏肯感雙眉有酒重斟一鞭殘照鴉亂
草橋西

虞美人 午日

菖蒲斜映新粧曉羞佩宜男草綺羅輕揭入薰風
不覺流年偷換酒盃中香閨那解愁滋味但問
花開未小庭結子有紅榴笑折一枝親插內人頭

最高樓

題德滋第息心閣

儒家業未老遂幽棲鷗鳥共忘機小樓過雨清風

入虛牕映日遠山低晝遲遲堪對酒更彈棋也
不羨侯門珠履客也不羨石家金谷苑花月在自
相宜勤耕蚤辦租和稅高眠莫問是還非任登臨
雲起處燕來時

南柯子

雨中夜坐

涼雨飛檐急寒蜚泣露多西牕剪燭苦吟哦莫問
高城鼓角夜如何散帙生秋思烹泉遣睡魔詩
成起舞影婆娑今夕有無好夢到南柯

傳言玉女

棠村雨後看芍藥

紅滿西園正喜蕭蕭雨歇平沙聯轡更壺觴提挈

繁華錯繡姚魏漫爭優劣千林烟靄孤村風月
共是閒人對芳辰且懽悅遠山如沐與塵寰迴絕
韶光轉眼試把舊遊重說開樽攜妓去年時節
夜涼人靜小庭空花影亂碧陰重披襟消受晚槐
風往事嘆匆匆貪露坐斜月轉梧桐

甘州子

夜坐

二郎神

郎雪

旅燈寒擁蚤暗洒一簾風雪嘆辜負香衾徘徊長
漏欹枕愁腸百結偏怪無端孤館夢更攪得魂驚
心折空帶減沈郎眉停京兆曠閒風月 淒切酒

杯在手憂來難絕想此際蘭閨夜深無寐屈指歸
程未決瓶菊半殘篆烟猶裊庭閉滿堦黃葉把雁
書一紙銀缸獨照對人羞說

慶清朝慢

長至

鴛瓦凝霜鸞釵蟬霧鏡臺初試朝寒共傳五紋添
線葭琯陽還物候撩人處繡床中刀尺任拋殘牽
情緒偶離眼底仍到心間 驚乍冷疑乍暖攪愁
思天氣忒恁無端幾回登高望遠先怯雙鸞背寫
雲箋錦字偷將紅豆寄郎看斜陽裏淡烟暮靄攢

上眉山

喜遷鶯 上谷初度

旅懷孤子正屋角凍雲垂垂將雪別緒千端羈愁
萬斛強把綠樽羅列暗想畫樓佳夢羞說懸弧時
節最不准是蛛絲掛鬢金荷雙結 凄切天亦妬
眉嫵風流京兆偏磨折玉漏聲遲梅花吹罷俯仰
頓教心熱洗盞且開笑口顧曲重添華髮怎消受
這酒闌燈炮滿階殘月

意難忘 閨情

月滿虛廊喜蛾眉淡掃乍卸新妝冰肌衫袖短鳳
髻縷拖長鴛被煖錦幃張此際耐思量玉漏沉燈
花更剪試再端相 迴眸笑倚檀郎最銷魂細語
別有溫香含顰緣底事密約肯相忘憐繾綣惜年
光地老與天荒願共伊生生世世比翼成雙

探春令 閨情用晏叔原韻

瑣牕黃鳥傷人啼逗恹恹天氣送離愁一寸柔腸
裏偏不分鸚哥睡 畫闌風雨催花墜欹枕非關
醉筭春光九十匆匆過了多少閨中淚

春光好 旅况

茶鐺沸篆烟收伴春愁天氣宜晴宜雨弄輕柔
子野聞歌添恨仲宣漫賦登樓悵望所思人不見

水空流

謁金門 感懷

春寂寂鴻雁幾行歸北誰道家山渾咫尺層層雲
樹碧 十載傷心淚滴往事不堪重憶欲掃舊愁
新又積風柔難借力

沁園春 偶成

身似孤雲性同麋鹿喜歸去來憶尋花問柳平隄
試馬誅茅結屋好月啣盃麤糲情甘藜床夢穩漁
唱樵歌莫浪猜無拘束儘逍遙風月洒落襟懷
隄然又染塵埃嘆迂濶先生何苦哉看良平奇計

人爭鬪巧儀秦辯口我媿非才如水臣心桂薑愈
辣辜負黃金買駿臺榮枯事有天公作主任爾安
排

金人捧露盤 遊燈市

憶當年燈燦爛影交加走御街寶騎輕車風光一
樣帝城粧點恁繁華玄都觀裏渾如夢重問桃花
裊珠鞭衣馬客新意氣競相誇笑揮金儘把春
賒無邊烟月都歸貂錦五侯家小牕誰識真消息
梅影橫斜

洛陽春 元宵後雪

纔過傳柑佳夕曉
牕飛雪重重簾幙落
梨花總不碍燈和月
蕭洒柴門塵絕又添
春色踏歌聲罷
灞橋詩天未許風光歇

子夜歌

寒食

皇州一夕傳宮燭
五侯宅裏烟凝綠
何處最關愁
佳人倚畫樓
水邊縈醉客
金犢驅油壁
鄉思黯
黃昏梨花溪閉門

漁父

鄉思

大茂山前雨乍收
韓河水漲浪花浮
新笠子小漁舟
我欲垂竿白鷺洲

美少年

夏夜

蘭湯浴罷時簫局
沉烟縷偷取
遠山青描作眉兒
諸茉莉幾枝開
小摘還頻數
香汗等閒消
一陣黃昏雨

拂霓裳

中秋

鳳城邊女墻孤雁破
寒烟清影上
泠泠風露敞
秋筵澹雲新
霽夜淺水晚
荷天問嬋娟想
瑤臺桂闕是何年
今宵昨歲荒驛舍
雨纏綿流光迅
幸逢人月兩團圓
笙簫蓮漏下
方尺瑣牕前
酒盃寬喜昇平歌舞滿
長安

歸朝歡 除夕

帝里又驚樹歲酒世事浮雲空白首庭前歷落擁
冰霜江頭寂寞舒梅柳東風何太陡京塵虛負漁
樵耦剪燈紅且傾栢葉莫問經綸手六街爆竹
喧闐久輕煖輕寒門閉後麗譙已聽漏聲頻綺牕
賦得椒花否春光來戶牖明朝可保朱顏舊謝東
君一年盡也此夕拚相守

菩薩蠻 春暮

散衙晴暖茅齋小落花寂寂鳴山鳥白晝放春閒
那堪春又闌往時春酒社繫馬垂楊下今日任

東風羞看寂寞紅

前調 題畫

空巖漠漠溪雲起人家茅屋泉聲裏誰爲寫滄洲
當年顧虎頭冥濛潭上黑波湧魚龍泣好作臥
遊看江南雨後山

蝶戀花

西村牡丹開時追憶舊遊用蛟門韻

三徑葳蕤翻綵纈魏紫姚黃正是開時節疎雨淡
烟遊未歇飛花片片飄香雪翠袖殷勤歌一闋
倚曲簫聲此際銷魂絕人去亭荒音調徹曉風柳
外吹村月

小重山 重陽

籬下參差淺澹粧浮雲殘照裏又重陽鏡臺空憶
影雙雙花無主此日爲誰黃 蕭瑟罷萸囊風烟
羞故國遠山蒼登高縱目事荒唐杯入手驚見鬢
邊霜

五綵結同心

元夕婚期用趙彥端韻

雲開瑤闕月滿星橋人如碧漢浮槎燕市東風軟
香塵裏調笑夜氣偏佳喜看春色來鄉國朝來報
鵲噪簷牙燈光映亭亭綠萼養成畫閣仙葩 遙
知繡簾深處正流蘇婉轉低傷牕紗六代歌絃五
陵遊騎粧點一片妍華九枝青玉歡相照麟麟聽
車碾平砂好趁此團圓時節領取上苑鶯花

行香子

宿清風店

鴉亂斜陽綠柳千行村墟外禾黍平崗人家烟火
歸壘牛羊喜中山近新市渡是吾鄉 親朋聚首
濁醪在牖乍相逢先問農桑三年京國萬里遐荒
看燈生暈人已倦話偏長

永遇樂

偶感

記得清宵高燒銀燭樽前歌舞錦罽蠻鞞鸞笙鳳
笛一串驪珠吐樓空人去蕭條寶瑟付與落紅飛

絮怪何戡渭城一曲險認舊人風度 彩雲安在
嬌喉久歇一似昔遊重遇對此茫茫百端交集惹
起愁千縷綺筵燈地空堦月落惆悵梧桐秋雨盼
今夕追尋好夢酒醒何處

如夢令

女汲

屋角銀濤千頃纖手攜將修綆素足傷清流濺溼
凌波不整磯冷磯冷風動半江花影

謝秋娘

舟中女

誰家女十四正她頭臨水窺牕分黛色驚人却步
褪蓮勾怕惹燕鶯愁

意難忘

本意

簾押風輕看脂勻粉膩百蘊香生秀眉分嫩柳私
語學新鶯條脫煨玉釵橫蓮步悄無聲一縷絲天
元有意付與雲英 良宵花媚燈青喜溫存性格
笑靨相迎西牕人靜好南浦句丁寧星半落夢初
醒捲幔水盈盈倩誰將相思紅豆寄向多情

一葉落

橘皮鞋燈

蓮落葉新生月製來也伴燒燈節紅幫三寸香芳
心一星熱一星熱莫向孤眠爇

柳腰輕

偶見

連絲涼雨飛簾幕春宵永孤衾薄隔籬鶯燕并肩
綽約道是初開屏雀鬆條脫錦瑟絃調卸香雲鬢
蟬釵落 娣姒冠兒嬾着露春纖更加梳掠小牕
私語背燈偷見不管離人蕭索江城畔春色三分
都讓與水邊樓閣

春從天上來

壽羅弘載兩尊人

海上春城羨高士齊眉玉骨雙清朱顏宣髮小築
林扃晴牕圖史縱橫有佳兒昭諫拔赤幟詞苑爭
衡任徜徉聽辛勤機杼靜好琴聲 簾外新翻樂
府更鱸切銀絲酒漾金罌桂嶺紅雲珠江寶月載
來一水盈盈向樽前爲壽渾不讓絳雪青精綵衣
輕飛花沾袂高樹啼鶯

賣花聲

清明

日射晴江影動柳塘花塲鬪芳菲榆烟杏粥五陵
遊冶踏河橋新綠對東風笑人孤獨 朱門此日
座擁滿堂絲竹鷓斑燒翠圍紅簇天涯人遠冷奩
香釵玉怕消減金蟬一束

羅敷媚

偶見

春江艇子看人面臉暈生霞鬢影堆鴉艷似孤村
二月花 深藏生怕蜂窺見懶掃鉛華悄映牕紗

借問當壚第幾家

大江西上曲

秣陵留別方邵村侍御

海天歸櫂近長干紫氣遙看山色驄馬來從桃葉
渡執手欷歔今昔詩酒人豪江湖孤艇老去稱狂
客七年重遇蒼浪頭髮雙白聞爾六詔風烟五
羊珠月盡入臨川屐我亦越王臺畔過恨少羅浮
片石世事如萍舊遊難再且聽桓伊笛勞勞亭上
暮雲頓阻南北

輓轡金井

江南春暮

暖雲如粉草芊緜畫閣曉粧時節鸞鏡初開把春

衫香裊拋殘線帖向柳外聽鶯尋蝶淺水溪橋笑
招女伴桃根桃葉沙堤踏青步履儘風吹鈿朶
裙衩波濺鬪草平蕪逞芙蓉雙頰花鈴暗掣蚤驚
見綠楊飛雪報道春歸海棠落盡杜鵑啼歇

剔銀燈

寄祝德滋弟

壯歲浮名拋擲但有事東阡南陌好月涼颺小門
深巷消受酒紅燈碧莫辜秋夕拚醉倒人間狂客
况是頭鬢未白千歲徒憂奚益小婦調笙霜螿
入手不數瓊筵瑤席金貂烜赫肯換與雨蓑雲笠

一斛珠

題扇頭撲蝶圖

拋殘線帖金鈿巧襯芙蓉頰花間小步香生屨鳳
子蜻蛉覓徧閒枝葉 畫眉人遠腸千結滿園秋
色同誰說笑攜女伴風前瞥扇撲輕羅惱煞雙飛
蝶

滿庭芳

壽王敬哉宗伯

綠醕方濃黃花未謝後堂深處張筵歌鐘舞袖輕
煖小春天猶憶尚書曳履 九重識風度巖然歸
田後行年七十步履若飛仙 翩翩繞膝下鳳毛
麟角壁合珠聯更閒吟新句小擘蠻箋客至頻開
東閣渾不數座上三千趨庭日折衝樽俎譚笑息

烽烟

洞庭春色

長至曉雪

律轉微陽日當長至歲月堪驚正寒生鴛枕低垂
銀蒜綺牕雲暗斗帳香凝燕市風光憐暮景更朝
雪紛紛移我情開簾幕看簷牙飛絮堦砌堆瓊
追思去年此日迢遞向水驛江程蚤月高溢浦帆
停廬岳一灣漁火幾點疎星愁擁孤衾彭蠡曉但
五老遙來天外青數聲欸乃家山萬里鄉夢初醒

春風裊娜

上元王胥庭司馬召飲觀劇

喜良宵烟月依舊清平花市煖晚風輕有尚書好

客堂開簾捲故人歡笑粧點春城百寶珠輪九枝
青玉絳燭高燒列畫屏琥珀光浮千日酒赤瑛盤
薦五侯鯖 誰把燕山舊事移宮換羽倩優孟譜
入新聲紅牙串紫鸞笙歌喉未歇客欲沾纓夢裏
功勛休嗟陳跡眼前杯酌且盡平生種槐庭院看
年年無恙紅燈綠醕快聚良朋

瀟湘逢故人慢

寄蛟門時方校訂余使粵詩

綠烟如霧蚤花塢飄紅柳堤拖絮芳草生汀浦正
人立斜陽雁迴沙嶼書自雷塘喜剖得故人魚素
戰聲裏詞客蕭閒收拾嶺南新句 水添波春又

暮憶縹緲江樓歸帆懸處極目邗溝路奈往事隔
年停雲頻賦風雪旗亭可更有雙鬟重遇想剪燭
樽酒論文惆悵蕪城春樹

大江西上曲

寄懷弘載

蘭橈畫槳嶺南舟共泛湖天寥廓髯客揚舲蘭渚
去折柳滕王高閣江上登樓樽前擊鉢轉眼分今
昨雲山千疊舊遊頓爾蕭索 聞道戍堞烽烟戈
舩鼙鼓宛委軍聲惡當日應徐無恙否八口可安
林壑阮瑀從軍陳琳草檄豈嘆功名薄爲詢羅鄴
壯懷肯令飄泊

風流子

長安寒食

宵來風撼檝清明候做出鳳城春正綺陌喧闐塵
沙撲面羽書襍選簿領勞人關情處故園調杏酪
上塚碾香輪榆莢影邊酒旗何處山桃村裏金勒
如雲 蹉跎時序改流鶯喚幾度悵望斜曛空聽
稠飴賣罷新燕聲頻看秋千院落雙垂綵索梨花
雨夜深閉重門曾否麗人水畔鳥啄紅巾

踏沙行

送春

暖入晴牕簾垂朱戶闌珊花事今如許長天嘹唳
兩三聲閒愁不共征鴻度 暗換薰風忙催柳絮

五陵衣馬芳原暮畫樓人倚綠肥時落紅曉捲殘
春去

一寸金

夏日傳去異邀飲觀劇

茉莉飛香風滿簾櫳入輕縠正琅玕畫長紋生碧
簾冰盤高列光搖寒玉白墮樽凝綠行厨進露葵
芳菽樂工是內部梨園錦罽蠻鞞競絲竹 日永
如年門閒似水何心問除日喜主人情重深杯避
暑詞場對遣清筵顧曲演到關情處憑燒燼兩條
銀燭歌聲裏有客沾裳疑聽燕市筑

南柯子

題扇面美人課子圖

綠映眉痕淺釵同鬢影斜課兒曉起洗鉛華一任
瑣牕開盡半簾花 續史齊班女知書比謝家碧
苔小徑靜無譁想像當年韋母隔輕紗

一叢花

題邢江女子畫扇

白團似月復如霜點綴倩紅粧芳心一寸經營徧
平寫出半面秋光毫涓唇脂墨沾衫繡展向小晴
牕 草花歷亂暗飛香綺翼太猖狂肯教棄擲西
風後任出入懷袖何妨蝶粉存無蜂黃退否此際
耐思量

月上海棠

庭前秋色

西風暗裏窺牕牖小庭閒獨立夕陽夕花落金錢
露葵開藥闌如繡關情處自嘆吾衰白首 暫來
蝴蝶黃昏候對深杯辜負紅酥手消受清芬怎當
他涼侵衫袂秋雲外幾層家山是否

八節長歡

生子家燕時孫婿初婚

捲幔傳觴看新秋色雲影天光月鏤歌扇小風裊
篆烟長頻聞西塞捷書奏正白頭弧矢初張又看
吹簫跨鳳彩翼成雙 筵前熾炬分行羞管咽新
聲唱出伊涼爽氣滿羅衣金鑿落休教負却歡場
重斟酌共領畧酒釀花香湯餅會呼巾拭面今宵

驗取何郎

天仙子

七夕小飲用張先韻

急雨斜風臨檻聽疎闌晚霽花初醒又逢此夕會
天孫頻攬鏡憐清景細數流年心自省 一片秋
雲筵際暝杯光浮動星河影燭花重剪話團圓螢
不定喧纔靜新月窺人苔滿徑

柳腰輕

題陶侶姪所持王生山茶蛺蝶圖

王郎雅擅丹青筆冰紈小經營極碧雲裁葉珊瑚
鏤翼圖出無邊春色風微度蝶粉初勻雨新晴盡
痕猶濕 渲染黃徐堪敵把江南歛移河北皎欺

秋月香生懷袖勝賞忻同晨夕伴揮塵小阮風流
乍粧成草堂蕭瑟

五福降中天

壽同門王敬哉

早辭簪紱徜徉久窈窕結成書屋筇杖看雲晴牕
弄筆消受燈青酒綠蒔花種竹偶佳客過從論文
刻燭抵掌朝家舊事文獻推公獨 暖律將迴黍
谷介眉稱慶處斑衣簇司馬蟬冠中原鳧鳥京兆
新登除目朱顏帶笑錦罽傳觴滿堂絲肉座上詞
人有雲間二陸

東風第一枝

贈傅去異令魯山

梁苑詞人秦川貴介翩翩蚤下雙闕琴臺曾否猶
存商餘有無堪躡春風鳧舄到時正芳原花發試
聽取閨井絃歌拋却故山烟月 紅燭爇離尊未
歇驪唱罷角聲又咽人衝嵩少寒雲馬嘶驛亭霽
雪唐賢舊地誰更把風流重接好譜成于薦新聲
莫讓當前哲

春從天上來

初度 時生兒彌月曾夢有
餉五苗圖者因以命名

臘雪初融正上苑陽回淑氣先通霜添衰髮興託
歸鴻帝城歲月匆匆又時當初度筵開處酒綠燈
紅奏清歌喜嘉平永夜月滿簾櫳 五十年華細

數憶少不如人意外遭逢廿載趨朝五苗入夢犀
錢繡襖重重笑生平鹵莽曾掉臂蛟窟鼉宮漫敲
評無邊春色共醉東風

永遇樂

元日大雪

一夕東風鳳城吹雪河山春蚤絮起高簷花飛綺
陌鴛毳平鋪了三冬凝望茲宵纔見共祝歲豐時
好曉來聽清絲天上粧點璇霄多少 朝回謝客
薰爐茗椀生受瑣牕寒峭香土東華壯懷銷盡拋
却閒煩惱驅馳嶺海倥傯案牘贏得風塵人老問
何日普天洗甲冶溪獨釣

東風齊着力

十四夜用胡浩然韻

百寶燈輪六街鼓吹做就繁華鳳城月滿春到萬
人家多少朱門貴客張高會笑擁名娃香風送爐
添鵲腦斗帳低斜 幽興亦堪誇清影裏凍枝絳
燭交加一簾夜色別自貯烟霞小擘烏絲寫句迎
人意暖閣梅花閒消受霜柑素瓊春餅芹芽

玉漏遲

十五夜用宋祁韻

烟花開紫陌家家繡戶華燈懸蚤上苑東風吹到
郊原細草燒徧旗亭絳蠟弄春色冰澌芳沼樓閣
悄何人深院新粧偏巧 一樽散遣閒情招詞客

南皮逢場歡笑簫鼓西鄰助我月中清眺待得酒
闌燭燼喜自有寒花相照金勒杳遊人畫橋多少

金明池

十六夜用秦少游韻

氣暖璇霄波融太液寶炬分開輦路當此夜衣香
人面星橋畔暗塵如雨奈銀花火樹蕭條頻凝望
角觝魚龍何處正門掩東風篴橫別院讓與侯家
歌舞 欲倩東皇強作主把三夕春光一宵畱住
金縷奏漏聲停滴玉缸倒客懷莫訴况年來子野
多情看天外風烟人間荼苦仗冉冉韶華溶溶殘
月都向醉鄉歸去

雨中花

燈宵後小雨

前夜殘燈薄霧燕燕鶯鶯無數聯袂香停弄簫人
遠幾陣廉纖雨 几倚烏皮吟短句紅燭依人如
故看有限風光無端春思不分閒牕暮

漢宮春

送陳子萬歸荆溪

雪霽燕關有吳客將歸越吟蕭索池塘草色夢入
君家康樂偶攜書劍逐寒烟壯遊河朔從市中狗
屠擊筑相看酒壚酬酢 千里春風垂橐嘆秦川
公子梁園棲泊長門價賤誰識臨邛搖落仲宣顛
顛賦登樓仗憑春屨且作達放歌湖海莫問人情

雲薄

小桃紅

春晴

陌上風微逗暖日烘晴晝砌草纔生遊鱗初躍賣
餉時候看家家齊把繡簾開試輕衫紅袖 寂寞
城南柳望斷家山岫燕子無情杏花何處春過八
九鬢蕭蕭難逐少年場攬鏡羞回首

剔銀燈

春雨

輕煖薄寒不定醞釀出瀟瀟烟景眉嫵牕紗牙籤
簾几春晝須人承領淡雲微雨生催促碧桃紅杏
當日西園三徑正好泥香林靚花發疎欄笛橫

別浦載酒徵歌尋勝東華畱滯都分付短檠孤詠

謝池春慢

寒食用張先韻

湘簾繡幕早吹得東風到禁火碧烟疎上塚香塵
曉柳岸青方嫩花豔紅猶少酒旗斜嵐岫渺沙平
草細野水連殘照五陵挾彈爭走馬長楸道天
氣晴兼兩人面頰還笑霧染春衫濕歌溜鶯聲小
時虛度愁未了調笙何處總入伊涼調

喜遷鶯

相國出師

雲開宮扇正授鉞專征香生春殿入媿蕭曹出兼
方召推轂玉階親遣主翦頻陽再起裴度淮西重

見螺聲裏蚤營屯細柳陣名鸞鶴爭羨刁斗肅
老將臨軍要使旌旗變半壁秦關三章漢法肯更
逍遙河畔急雨已看洗甲絕塞不聞傳箭鷓行列
問何時飲至麒麟高宴

金鳳鈎

上巳

春偷減賒無計怪非雨非晴天氣梨花開落情多
生怨難向芳原修禊長安水畔新蒲細可更有
佳人拾翠蘭房徙倚夢回窺鏡試驗朱顏凋未

新雁過粧樓

偶感

雁影縱橫微雨過綠陰巧弄新晴風烟非舊暗數

當日王程粵秀山頭遙騁目海珠吞吐暮潮生到
如今蕉紅草碧半襍軍聲 鬱孤臺邊醉客掛片
帆載月水漲花明樓船飛檝驚破曉樹啼鶯霏霏
嶺雲幾縷歎眉黛蕭條冷畫屏春何處剩亂鴉殘
照愁煞江城

賀新郎

午日賀友人納姬

綺閣迎新暑捲湘簾冰紉初展紅榴爭吐此日雙
蛾纔畫了十樣眉痕重譜蚤試罷銀瓶薇露斗帳
濃薰宮餅熟聽玉簫吹徹朱樓午蓮得偶鸞雙舞
彩毫自寫香奩句想燈前定情良夜紅牕私語

佳麗東南渾占斷不分春光歸去倩乳燕雛鶯畱
住嫁得風流金馬客似當年絡秀傳千古蘭夢叶
天應許

綺羅香

午日

葵扇迎風榴芳照眼鵲尾鷓斑香吐兒女憨生爭
把釵符綴虎佩丹砂乍啓清樽誇益智競傳角黍
問江南金粉山川波心幾許舟飛渡 驚心雲外
羽檄但聽潮聲裏軍船鼙鼓繡柱珠簾一半沉埋
歌舞登樓賦王粲愁時弔湘水靈均何處休辜負
眼底繁華流年難更數

沁園春

讀董舜民蒼梧詞賦贈

六代風流江左文豪杖策北來羨一編在篋餐霞
霏玉千秋自賞絕艷驚才憔悴江潭逡巡京洛十
載蘭成意可哀苾鞵徧仗烏絲綵筆抒寫孤懷
而今名滿燕臺看鞭弭中原何有哉儘危樓百尺
從君高臥旗亭羣伎聊與徘徊雪苑人稀酒壚風
邈讀罷新詞倦眼開期成賦有黃金爲壽一拂塵
埃

喜遷鶯

送葉元禮登第南歸

曉鶯頻轉正吳下才人子虛初薦杜曲看花新豐

貰酒領取暖風輕扇舊按雙鬢牙拍新聽九天絃
管猶堪憶向中原奪幟滯畱梁苑 繾綣酬唱處
客路論文洗盡風塵面蘭畹餘香玉臺麗藻搖筆
書成黃絹歸棹重尋烟月畫錦爭誇袍茜一門內
將科名文采君家獨擅

三姝媚

題仇十洲篋篋圖

茅亭連澗草看青山一抹白雲遮了髻几桃笙有
翠眉紅袖淺顰低笑寒出春纖二十五冰絃縹緲
密坐焚香牙拍輕催雙鬢嬌小 捲幔東風吹蚤
更蘿徑烟深藥欄花繞曲奏雲和伴林中高士瑟

琴靜好江樹歸舟向夢裏相逢偏巧記取筵篔朱
字青春未老

望江怨 題畫扇

闌干小幾處金銀花綻了香入蘭閨曉東家蝴蝶
飛來蚤奩鏡悄莫使撲輕羅畱伴秋光好

瀟湘夜雨 暑中喜雨

炎熇橫侵火雲亂擁終朝霑透輕衫陡來涼雨風
捲入湘簾似聽潮聲夜發庭柯響飛瀑高檐空濛
裏層城爽氣西嶺碧于簪 憑誰除酷吏冰紈不
御花露微涵更晚香初逗清影鬢髮擬對疎燈散

帙閒消受緜几牙籤螢光細蜻蛉翅顫烟雨小江
南

疎簾淡月 雨後幼平表弟子諒內弟招飲
觀劇演隋末故事

雨餘如沐正暑氣乍消階除新綠有客樽開琥珀
駢羅絲肉珠簾高捲斜陽裏扇熏風小堂花竹遏
雲絃管忘形親串清懽何足 嘆當日陳隋競逐
看螢苑迷樓皆成荒麓重演繁華蓮鏡光涵冰玉
揚州烟月渾如舊更誰翻夜遊清曲興亡一夢且
酬佳夕笑難銀燭

百字令 送曹頌嘉中翰省覲歸江陰

金門倦客戀庭闈，頓使梁園蕭索大雅榛。蕪君崛起健筆韓歐復，作排闥縱橫颺回浪激珠玉隨風落。雄文讀罷瓣香今日重握，惆悵暑雨紅亭才人萍散，揮袂饑臣朔子舍承顏清晝永，細把千秋商畧申浦奇雲大江華月高詠恣橫，架巖棲未穩相知半在黃閣。

如此江山

送孫岷瞻學士省覲歸吳興

淙淙幾夕青門雨，學士碧山歸去詞苑無雙臚聲。第二煒煒照人瓊樹文推繡虎，每東觀陳書花磚徐步故國關情河梁抗手冥鴻舉。江山罨畫如

舊歎無端戰伐灰飛樓櫓衣錦爭看倚閭親在菽水。九重恩許輕帆曉渡趁夾岸芙蓉菰蘆溪處鷗鷺何猜南陔篇自補。

拜星月慢

七夕何婿生辰觀劇

岫爽迎襟庭柯含雨一泓好天良夜落葉疎香綴秋容如畫鵲橋展喜遇九霄嘉會散作人間蕭洒玉潤懸弧正雲開晴乍。蟻浮樽軒檻飄蘭麝新聲倚弄笛紅燈下搬演文武衣冠成六朝佳話問天孫此夕應無價堪相賀秦隴烽烟罷畫屏冷客醉醞醞看銀河欲瀉。

金菊對芙蓉

贈楊亭玉學博士龍謂陸子恂若龍眠謂方侍御邵村也

新雁穿雲蒼葭綴露傷離最是清秋正客星漸遠
數賦登樓比鄰一載頻攜手聽舊雨茗椀燈篝士
龍已去巨源又別萍散皇州 襆被蘭若遲留更
客到龍眠共醉壚頭嘆廣文獨冷旅髮霜稠才人
憔悴哀庾信青衫擁長揖公侯莫嫌祿薄盤中苜
蓄儒吏風流

滿庭芳

秋夜觀劇中有歌者娟秀如好女

霽色迎人檐花戀客暇日簾敞前楹杯浮醞醪秋
滿鳳凰城笑聽吳歛佐酒繁絲與夜氣同清燈兒

下梨花素面看煞小秦青 輕盈且漫說殷勤渭
唱窈窕旗亭儘燒殘絳爍炙暖鵝笙奏徹江東白
苧座中有杜牧多情渾消盡閒愁萬斛瑤瑟憶湘
靈

燭影搖紅

友人出家伎佐酒

絳燭秋宵朱闌曲曲開芳醞曼聲檀口嘖雛鶯膩
臉薇香嫩樂府新翻偏韻乍回眸紅潮微暈元人
宮調吳下排場風流重認 舞罷前溪爍煤落翠
懽無盡寧王玉笛莫愁歌更有蠻鞞襯銷却柔腸
一寸怕催人漏銅滴緊愁多子野狂發分司笑廻

紅粉

花發沁園春

贈徐方虎編修歸德清

屈宋衙官曹劉驅駕文壇手闢荆棘才江學海剩
馥殘膏沾漑人間詞客相如病渴歸夢繞鄉關秋
色蚤謝却傑直承明經營登山雙屐 悵別河梁
蕭瑟有青門供帳紅亭風笛霜零葭菼楓冷江樓
盡入濤箋湘筆軍船戰鼓渾不礙雪溪泉石還朝
日鏡吹篇成佇看燈撤蓮碧

畫屏秋色

中秋邵村過秋碧堂小飲

帝里敲雙杵聲械械檻外落英堪數舊雨人來圖

書共賞秋堂容與題寫徧宮牋旋解帶呼奴爲黍
都不辨誰賓主任鄒衍譚天東方諧口收入龍眠
塵尾遂空今古 看取浮雲如許何須問當年投
杼燕昭臺畔荆卿歌裏高城輪吐醜酒醉金波逢
場不分年遲暮人在瑤樓玉宇作達對西風試把
中原屈指豪傑疇當旗鼓

望遠行

送方邵村遊山左

銷魂何事輕言別把酒渭城重唱畫師詞客草聖
文豪並擅一時飛將燕市狂歌無復漸離擊筑蕭
瑟壯懷誰向幸相看華髮青山無恙 惆悵滿目

津亭衰柳正潞水瀾瀾秋漲趵突泉聲鵲華霜色
都付苾鞵筇杖猶憶西牕剪燭南樓聽雨消盡東
華塵塊擬他時夢繞風烟江上

飛雪滿羣山

贈莊澹菴宮坊入秦

廿載通家五雲仙客烟霞未改朱顏中林久臥春
明重入共傳前度人還擁圖書滿載渾不讓襄陽
畫船西行投袂衣裳短後杖策入秦關喜此日
咸京烽火息嶷然天府百二河山風高鄴杜霜清
韋曲孤吟驢背橋灣助軍儲塞下歸來正花明柳
妍長揚羽獵抽毫賦作楊馬看

惜秋華

九日同張黃美諸子登高

葉落長安綴秋光半在琳宮高處騁目振衣蕭瑟
畫樓烟樹蒼浪雙鬢京華客無奈滿城風雨憑飛
檻河山千疊消磨今古紅蓼搖汀浦與廣陵遊
子同牽愁緒嶺海回頭一夢重陽屢度可憐江閣
黃花憔悴向戈船火鼓延佇仔細把茱萸拈取

萬年歡

汪蛟門舍人舉子賦此志喜

明月揚州正繽紛桂子飛來瑤闕入掌珠圓產自
渥洼丹穴試聽啼爲英物有多少瑞雲高結開湯
餅廿四橋邊玉簫檀口吹徹弄麈書帖京華羈

客成一笑屐齒應折慧業文人蚤向金閨名揭今
喜書香堪接着蓬矢桑弧初設卜他日謝氏超宗
鳳毛檢覓重說

高山流水

題汪蛟門少壯三好圖

舍人蚤達擅才名寫孤懷聊寄丹青紅袖儼成行
清絲奏出新聲牙籤滿圖史縱橫便便腹指點雙
鬢索酒小婦鳴箏且閒情作達蝸角詎堪爭飛
騰看徵逐如許渾冷落翠黛金罍千古有彥瑜知
已長揖爲朋世人誰醉復誰醒破愁城吾衰讀書
恨晚杯酌難勝儘風流三般總讓與汪生

家升父司農公教子弟家法醇謹雖步履步
旋進退規矩必合法度自理學經濟諸書外
稗官野史都不令流覽然於詩詞必使涉獵
焉曰所以發其興觀怨使識古人美人香
草皆有所寄托也故允植得從間竊觀叔父
蕉林集凡樂章小令必一一從純素間誌之
先是松陵徐子電發請于升父合宗伯龔公
詞刻之吳郡已風行海內矣然崇村詞猶允
翠麟角未覩全豹也允植因蒐輯叔父前後
諸稿與徐子重爲校訂徐子益勸允植增梅

村祭酒並為三先生詩餘行世云南北鼎峙
似索珠玉六一東坡後世必有傳者君其為
升原之小山乎允植謝不敏然叔父之詞則
河朔江南傳唱已遍固非允植小子一人所
得而私也姪男允植謹志



跋

鈞既刻合肥宗伯七十二芙蓉詞成攜至京師西
樵阮亭諸先生都稱善本共贊刊播宇內名作以
備樂府之選一日謁大司農梁公於蕉林書屋公
從末座召鈞至前指陳風雅乃得竊侍几杖讀公
撰著請效校讐之後先以詩餘從事未幾南遊錢
塘倉卒併裝不遑盡啟枕秘僅從蛟門舍人許搜
得公棠村詞數十闕並散見于鈔統零素問者歸
鏤之吳郡雖片鱗嘗鼎而詞場宿老已爭購不置
公小阮治涓令君因力請全集先生遂從家郵中

以先後諸稿授梓治涓政事之暇細為裒輯時執
與公家雲麓遠在署內治涓訂與同校因遂得窺
全豹始知公不厭以詩教古文為海內所傳誦即
長短句亦奪冠平仲歐陽永叔之座也時康熙甲
寅春仲吳江受業徐欽謹書



范文正司馬溫公韓魏公皆一時名德重望范御
街行有眉間心上無計相迴避之語韓點絳唇有
武陵凝睇人遠波空翠之句至溫公西江月直云
相見爭如不見有情還似無情風涼婉麗其視廣
平梅巷一賦又為過之非故好閒情也直因至性

纏綿鬱而不洩遂借長短句以抒其忠愛之忱不
然彼榛苓之頌美人離騷之歌香草將不登於周
秦漢魏以上也癸丑冬日因弟允植較鐫叔父棠
村詞集遂連類及之姪男天植謹識



棠村詞終



卷之三